

Studis istorics davart famiglias alpinas

Otgtschient onns migraziuns en valladas sur Martigny

■ **(gsc) Las valladas alpinas han adina puspè fatg tras migraziuns. Quai resulta da perscrutaziuns manadas dapi strusch quaranta onns en la Val da Bagnes, ina vallada da las Alps vallesanas che sbucca en la Val d'Entremont a Sembrancher sur Martigny.** La vischnanca da Bagnes (7726 olmas), cun 282 km², è la terza da la Svizra areguard l'extensiu territoriala; ella era l'emprima en fin a 2008, ma Tavau ha cuntanschì 284 km² il 2009 suenter la fusiu cun Tain, e la vischnanca da Glaruna sid è naschida il 2011 cun 425,8 km². A Sembrancher è domiciliada la chanzlia dal «Centre Régional d'Etudes des Populations Alpines – Crepa»* organisà il 1990 sco uniu regionala, ma naschì gia il 1975 sco center per la retschertga davart l'istorgia da Bagnes. Dapi 2006 collavura il Crepa cun la Scola auta vallesana (Sierre) e cun las universitads da Friburg e Geneva. «Le Courrier» (Genevra) dals 4 da favrer 2014 deditgescha l'entira pagina 3 a Jean-Charles Fellay, chanzlist «bagnard» dal Crepa. L'artitgel

entschaiva cun ils plets: «È il Vallais simbol d'ina Svizra stataivla? Lez pregiudizi è vegnì vaira antiquà dapi che Jean-Charles Fellay e ses Crepa han entschavì ad analisar minuziusamain l'istorgia da las famiglias 'bagnardas'. Ins resguardava quellas pitschnas valladas alpinas sco munds serrads che s'isoleschian. Ils studis dal Crepa mussan però che lur populaziuns èn adina puspè sa maschadadas (...) e che l'identitad vallesana è sa renovada cun integrar las immigraziuns. Era la Svizra è s'unida per part enturn ils pass alpins. Las conclusiuns da Fellay e da sia squadra cunradin a l'ipotesa ch'il squitsch exteriur smanatschia l'identitad. El manegia che la populaziun svizra na derivia betg d'umans stabels da vegl enna, mabain d'ina maschadada che duria anc adina. Quai di el gist avant la votaziun 'cunter l'immigraziun da massa'».

Maschadadas constantas

L'autur dat lur il pled a Fellay: «L'uman ha adina duvrà la migraziun per surviver. Noss perdavants gievan davent per lavu-

rar, sperond ch'i vegnia lura meglier. Bliers na vesevan uschiglio nagin futur pli. Las debattas d'oz davart migraziuns politicas u economicas snegan il passà da noss pajais. Mintga emigraziun reage-scha ad in problem ed è a medem temp ordvart greva. Ins na va betg davent sch'ins n'ha betg ina personalitad d'aventurier (...). Ins viaggiava antruras pli pauc, ma ins emigrava tuttina blier e na turnava betg pli (...). En il Vallais, tranter 1200 e 1600, hai dà ina vaira maschadada cun passa 800 schlattas; da quellas avain nus perscrutà 130. Il 1639 cumparan ils emprims cudeschs da baselgia ['registres paroissiaux']. Bleras schlattas èn svanidas, (...) ma autras èn vegnidadas a las remplazzar (...). L'impediment principal era il possess funsil (...). La gliעד vegnida a star qua, senza laschar enavos cumprovas da marida e da mort, è simplamain svanida senza laschar fastiz (...). En famiglias cun pauc terren e funs maridava mo in uffant, e quai en fin a l'entschatta dal 19avel tschientaner. Lur èn las cundiziuns da viver sa meglieradas,

ed il dumber da maridas per famiglia è creschì. Pertge? Forsa perquai ch'il tartuffel è arrivà il 1796 sco vivonda da basa (...). Ils immigrants vegnivan cunzunt da dus intschess, la regiun dal Lai da Genevra e perfin da la Bassa, lura l'Italia tras l'auta Val d'Entremont, mo quai cunzunt davent dal 19avel tschientaner (...). La baselgia catolica determinava per gronda part la vita sociala. Tschientaners da ritus, il chalender liturgic, las stagiuns ed ina lavur stretgmain colliada cun il terratsch, tut quai integrava la gliעד vegnida per star.»

Il Vallais chantun svizzer

Il chantun Vallais è naschì il 1815. Fellay rapporta: «Tranter 1816 e 1818 èsi vegnì pli fraid pervi da l'explosiu d'in vulcan en Indonesia (...). Quai ha fatg donn a l'economia. Il 1819 èn ils emprims emigrants partids per la Brasilia [lezza giada reginam unì cun il Portugal], da Bagnes var trenta (...). Davent da 1839 èn emigrants partids per ils Stadis unids e l'Argentina; da la Val d'Entremont èn ids en

trenta onns passa 800, 10% da la populaziun totala. Lezza giada han las valladas pers gliעד en cumparaziun cun il plaun dal Rodan (...): Lez han ins arginà il 1850 (...). La forza da la cultura locala e la gronda coesiun sociala, colliadas cun las cundiziuns da viver determinadas da terratsch e clima, mainan oz ils immigrants a s'assimilare (...). Ma il Vallais na dessi senza ils esters. Il 1910 han ils Englais bajegià la viafier che maina qua da Martigny. Il turissem han Vadais, Genevrins ed esters mess ad ir. Ils projects da viafiers e da mirs da serra èn naschids qua, ma daners ed organisaturs èn vegnids d'utrò.» Entasum la Val da Bagnes è situà il lai da serra da Mauvoisin; il mir han ins eregi 1958 ed auzà 1991. Las retschertgas da Fellay pudessan inspirar perscrutaziuns sumegliantas en valladas grischunas.

* **Adressa: Rue Saint-Honoré 14, 1933 Sembrancher/VS. Telefon: 027 785 22 26 e 027 785 22 20. Vischnancas commembras: Bagnes, Bourg-Saint-Pierre, Bovernier, Finhaut, Liddes, Orsières, Salvan, Sembrancher, Trient, Vollèges.**